

Pol da Timoti do Papia 1

Mandagıt

But pıso gen

Timoti unun Yesu yolyol amın bulagı kinda. Unun Lista kokup pap Galesia Provinskon amın kinda. Menı unun Juda mınat kinda, anakwan datni unun Grik amın kinda. Pol da Timoti abıdanban kısı agek Pinkop gen yan tenjenok do pi agımal (Yabekbi kilapmı 16–20 unudon koki). Timoti Epe-sas kokup papgwan panmuwukbi egıpgwit dakon kila amın daganakwan Pol da papia on mandan imgut.

Papia on da mibiltok yosok unun yan: Amın dıwarı da mınat amıno dakon nandan gadatni panupbal ani yan do Timoti kan kimotjak do iyıgıt. Unun amın dakon nandak nandakni nıwakıwari tawıt unun yan: On mıktım dakon yo morap unun tagı dıma, do mınat amıno egıp egıp abıdok do nandan unun jap dıwarı dıma nok do gen teban yopgwıt, ae mınat yo kısı dıma pani do yanıop an yomgwıt.

Gen madepsi kinda gat mandagıt. Pinkop gawak imım sılıp unun kila tagısı ani, ae panmuwukbikon pi tagısı ani do mandagıt. Ae nıanen amın da panmuwukbi dakon kila amını egıpni ae pi amını egıpni unun do mandagıt.

Mıbı do Pol da Timoti Yesu Kristo dakon pi amın tagısı egıpjak, anek Yesu yolyol amın kalon kalon do ni anpak tagısı ban anyomjak unun do mandagıt.

*Timoti iyi gat ae paŋmuwukbi gat kisi dakon anpak kilani tagisi asak
(Kilapmi 1-6)*

¹ Nak Pol, Yesu Kristo dakon yabekbi kindi da on papia mandisat. Piŋkopnin yokwikon baŋ timit timit aminin gat ae Yesu Kristo unun nandan teban taneŋ jomjom aneŋ ekwamaŋ unun bamot da nak yabekbi pi abeŋ dosi nayigimal.

² Timoti, gak nandan gadat asal do nak da gandabo gak monjinosi asal. On papia gak do mandan gamisat. Piŋkop Dat ae Amin Taginin Yesu Kristo dakon bupmini gat ae but yawotni gat gagon tosak.

Top gen morap do kaŋ kimotneŋ

³ Nak Masadonia miktimon kinex gen gayigim unuden aeno sigin gayisat. Gak Epesas kokupmon sigin egek miŋat aminyo Piŋkop gen yoyiŋ dekgaŋ amin di yoyiŋdet ani bisapmon top gen dima yoni do gen tebaisi yoyiki.

⁴ Ae babikni dakon binap gen gat ae babikni dakon mibili gat do dima yoni do tebaisi yoyiki. Gen unuden da gen emat paŋalon asak. Unun da Piŋkop dakon pi dima jonikdak. Nandan gadat aneŋ Piŋkop dakon pi aripmi tagi aneŋ.

⁵ Amin da notni do but dasi galak taŋ yomiŋek egipni, mibili yaŋ do gen teban on yipmandat. Amin nandan gadat bamisi aneŋ, ae burikon gwaljigi mini egek, ae butnikon da yokwi tagiyo dakon kokwin tagisi asak kaŋ, amin do but dasi galak taŋ yomyom anpak tagisi tosak.

⁶ Amin diwari da unun anpak yopmanek gen isali banjin yanek ekwan.

⁷ Unun amin Pin kop dakon gen teban yoyindet ak do tagisi nandan. Anek nin da bamisi yoman yan nandan, mani gen yon dakon mibili dima nandan pisanek yon.

⁸ Nin nandaman, gen teban Pin kop da ni pi nan asak do nandagit unun asak kan, gen teban unun yo tagisi kindi.

⁹ Gen teban unun amin kilegi do dima tosok. Unun gen teban pabin yopmangan amin, ae kwen wigik an amin unun do tosok. Unun Pin kop manji iminek yokwi an amin, ae Pin kop gawak im do dima galak tanek Pin kop dakon yo do yanba yokwi tok an amin do tosok. Gen teban unun amin men datni gat ae amin diwari gat dapba kimokgon amin do tosok.

¹⁰ Gen teban unun amin yumabi mibili mibili an, ae wili da wili notni gat wam ton amin do tosok, ae amin kabo pan kisibin pan ki oman monji egipni do mone pan amin gat, ae top yon amin gat, ae topmon da geni pan teban an amin gat unuden amin do tosok, ae Yesu yolyol dakon gen madep madep morap ton unun yapmanek anpak yokwi diwari an amin unun kisi do tosok.

¹¹ Gen bamisi unun Pin kop da Gen Bin Tagisi yan tenjenok aben do namgut unun. Pin kop unun tilim madepnikon egisak. Unun an kisin kimotnensi.

Pin kop dakon bupmini do Pol da ya yan iyigit

¹² Amin Taginin Yesu Kristo da tapmim naminek nak pini unun aripmi tagi aben yan nandane nak manjigit, do ya yan iyisat.

¹³ Asi, nak kalip uwalon da jigilak an iminek manji gen yan imgum. Mani Pinjop da bupmi nandan namgut, nido yo niban agim unun dima nandane Monji do dima nandan gadan imgum.

¹⁴ Amin Taginin da nak do nandan yawot wagil madepsi an namgut. Anek Yesu Kristokon sanbegim do anek nandan gadat anpak gat ae amin do but dasi galak tan yomyom anpak aben do nak antagap agit.

¹⁵ Yesu Kristo yokwi pakpak amin timit do miktimon pigit. Gen unun bamisi amin kisi da nandane nandan gadat tagi ani. Nak naga yokwi pakpak dakon mibiltok amin egipgum.

¹⁶ Mibili yan do anek nak do bupmi nandagit. Minjat aminyo nagon yo agit unun kanek yansi nandani: Yesu Kristo da yokwi pakpak amin do nandan yawok yominek but tobil ani do bikbik madepsi yomisak. Yan nandane nandan gadan iminek egip egip teban abidoni, mibili yan do yokwi pakpak dakon mibiltok amin nak do bupmi nandagit.

¹⁷ Pinjop unun Kila Amin Madep toktok teban egisak. Unun aripmi dima kimori, ae amin da aripmi dima kokogi. Unun kalongin Pinjop, do dagok dagogi mini man madepni gat ae tilim gulgwani gat tan anjan kikdisak. Unun asi.

Timoti, gak anpak yokwi pabin yop do pi tebaisi abi

18 Timoti, monjino, gak do kombi gen yawit, nak unun do nandanek gak da yo abi unun do gayikdisat. Kombi gen unun da gak anteban anakwan anpak yokwi pabin yop do emat abi.

19 Emat unudon Yesu nandan gadan imin kimagek butgokon da yokwi tagiyo dakon kokwin tagisi anek egipbi. Amin diwari yokwi aman yan nandan mani yan kwok aba Pin kop da pan kilek asak do dima nandan. Do nandan gadatni tap wakga da yan tipmon tidanek tuwil kwan.

20 Imenius gat Aleksanda gat da yan abal nak da Sunduk da kisiron yopgum. Unun nandak nandak kilegi timigek bunon Pin kop do gen yokwi dima yonjil do anek unun agim.

2

Pin kop da amin morap kisi pan pulugosak do bisit iyinen

1 Yo madepsi abi do nandisat unun yan; gak da minat amin morap yoyinbi bisit mibili mibili anek Pin kop ya yan iyinek amin morap kisi pan pulugosak do bisit iyini.

2 Kili amin madep gat ae kila amin morap diwari kisi pan pulugosak do bisit ani. Yan anek kan do tayan gok egek butnin yawori tanakwa Pin kop dakon galaktok morap yolek telagisi egipnen.

3 Bisit yan anen kan unun tagisi. Pin kop Yok-wikon Ban Timit Timit Aminin unun da yan anen do tagisi nandisak.

4 Unun amin morap kisi yokwikon ban timikban gen bami nandaba pisoni do nandisak.

⁵ Nin nandaman, Piŋkop kalonji dagin egisak, ae Piŋkop ae miŋat aminyo dakon binap amin kalonji dagin egisak, unun amin Yesu Kristo.

⁶ Kristo miŋat amin morap yumanj nok do egip egipni parekgit. Yanj anakwan Piŋkop da bisap yipguronsi miŋat amin morap yokwikon banj timit do si nandisak yanjsi noligit.

⁷ Piŋkop da nak iyi dakon geni yanj tenjenok aben do yabekbi pi namgut. Top dima yosot, bamisi yosot. Amin Nwakwari Kabikon kin yoyindet abo Kristo nandan gadan iminek gen bami nandani do anek pi unun namgut.

⁸ Nak wili kokupmi kokupmi ekwanj unun telagi kisitni panenagek bisit ani do nandisat. Butjap ae gen emari mini egek bisit ani do nandisat.

Pi tagisi da miŋat dakon tilimni asak

⁹ Ae gen kinda unun yanj: Miŋat imal pak do kanj, giptimni tagi witjini unun da aripmon gin pani, wili da pindak galaktok ani yanjon da imal yumanj nogi wukwi banj dima pani. Busun dangwani dima panjtilim ani, ae gol kindirinyo banj giptimji dima panjtilim ani.

¹⁰ Piŋkop yolek gawak imisat yanj yonj miŋat pi tagisi mibili mibili ani. Unun da tilimni bamisi asak.

¹¹ Miŋat iyi do nandaba pinakwa gen dima yanek tayangok egek Piŋkop dakon gen timit do pi ani.

¹² Nak miŋat yopbo wili dakon mibiltok amin egek Piŋkop dakon gen do yoyindet ani do dimasi nandisat. Mirak gin yopmanek egipni.

¹³ Nido, Piŋkop Adam naŋ mibiltok wasaŋek buŋon Ip wasagit.

¹⁴ Ae Adam top gen do dima nandan gadagit. Miŋat da top gen nandan gadaŋek yokwi agit.

¹⁵ Mani miŋat uŋun monji tagi paŋalani. Yaŋ aŋek nandan gadat aŋek amin do but dasi galak taŋ yomiŋek ae telagi egek aŋpak tagisi aŋek egipni. Uŋun aŋpak morap yipmaŋ deri mini ani kaŋ, Piŋkop da yokwikon baŋ timitdisak.

3

Paŋmuwukbi dakon kila amin aŋpak tagisi baŋ ani

¹ Gen on bamisi: amin kinda paŋmuwukbi dakon kila amin kinda egipdosi nandisak kaŋ, uŋun pi tagisi kinda naŋ abidok do nandisak.

² Kila amin uŋun aŋpak kilegisi gin aŋakwan amin da gulusuŋni kinda dima koni, ae miŋat kaloni dakon eni egipjak, ae iyi dakon kila tagisi asak, ae nandan kokwin tagisi aŋek aŋpak tagisi baŋgin asak, ae amin yutnikon kwa kilani tagi asak, ae yoyiŋdet agakni uŋun tagisi.

³ Uŋun pakbi teban naŋek but upbal dima asak, ae emat pidokyo dima asak, yawori egisak, ae gen emat dima asak, ae moneŋ timit do tek kindap dima asak.

⁴ Uŋun iyi dakon gwakni kila tagisi aŋakwan monji gwayoni da gawat gawaron da geni tagisi guramikgaŋ.

⁵ Amin kindsa iyi dakon gwakni kila tagi dima asak kan, Pin kop dakon panmuwukbi kabi dakon kila aripmi dima asak.

⁶ Amin kindsa Yesukon kaluk sanbesak unun da kila amin pi dima asak. Unun iyi do nak amin madep kindsa yan nandane kwen wigik aban Pin kop da Sunduk gen pikon yipgut, yan gin gen pikon di yipban.

⁷ Amin unun panmuwukbikon dima sanbewit amin da kanba amin tagisi asak unuden da kila amin man tagi abidosak. Kanba yokwi asak kan, man yokwi panek Sunduk da paron yokwaldisak.

Panmuwukbi dakon pi amin anpak tagisi ban yolek ani

⁸ Panmuwukbi dakon pi amin ununyo kisi amin da kanba amin tagisi asak, ae gen bami gin yosok, ae pakbi teban nane but upbal dima asak, ae amin dakon yo morapni timit do but kindap dima pasak.

⁹ Unun butnogwan yo mini yan nandane nandane gadat aman dakon gen bami morap Pin kop da noligit unun tebaisi timikdak.

¹⁰ Mibiltok pini do pan kilik pindatni. Pindakba pi tagi ani kan, yopba panmuwukbi dakon pi amin tagi egipni.

¹¹ Minatniyo kisi amin da kanba minat tagisi asak, ae amin do yanba yokwi tok dima asak. Unun iyi dakon kila tagisi anek yo morap asak unun kilegisi gin asak.

¹² Panmuwukbi dakon pi amin unun minat kalonji dakon eni egipjak, ae iyi dakon gwakni kila tagisi asak.

13 Pi amin unun pi tagisi asak unun amin diwari da nandaba wukwan imdan, ae Yesu Kristo nandan gadan imgwit unun do pasoli mini yan tenjenok akdan.

Pin kop da gen bami nomansi noligit

14 Nak tepmisi abin dandak do nandisat, mani papiakon gen on ji do mandaken kan tagisi yan nandisat.

15 Tepmi dima apben kan, ji gen on kanek Pin kop dakon amin kabi nin anpak nian ban anek egipnen unun nandani. Pin kop dakon amin kabi nin Pin kop egip egipmi ton dakon panmuwukbi kabini ekwaman. Panmuwukbi unun gen bami jonikban tebai tosak dakon gwak teban egisak.

16 Nin pakyan si nandaman, nandan gadatnin dakon mibili unun yo madepsi kinda. Unun kalip pasili tagit mani Pin kop da anroman agit. Gen bami noligit unun yan: Unun amin giptimsi paban amin da kawit, ae Telagi Wup da unun amin kilegisi yan noligit, ae anelo da kawit, ae amin da miktimi miktimi kin geni yan tenjenok awit, ae miktim amin da nandan gadan imgwit, ae unun Pin kop da abidan Kwen Kokup awigigit.

4

Top gen da minjat amin dakon nandak nandakni panupbal akdisak

1 Telagi Wup da yan si yosok, bisap kinda don apdisak, unun bisapmon amin diwari nandan gadatni wital kikan, nido unun wup yokwi amin

pankewalgaŋ uŋun dakon geni guramitdaŋ, ae koŋ dakon geni yoldaŋ.

² Jamba but amin da top gen baŋ miŋat aminyo yoyiŋdetdaŋ. Uŋun amin aŋpak yokwi aŋek mayagi dimasi nandaŋ.

³ Uŋun amin da miŋat aminyo miŋat eyo dima ani, ae jap diwari dima noni do gen teban yopmaŋ yomdaŋ. Mani Piŋkop nandaŋ gadaŋ imiŋek geni bami nandaŋ amin da uŋun jap morap timigeŋ ya yaŋ iyineŋek tagi noni do wasagiŋ.

⁴ Yo morap Piŋkop da wasagiŋ uŋun tagisi giŋ, do Piŋkop do ya yaŋ iyineŋek timitneŋ kaŋ, pindatno yokwi dima ani.

⁵ Piŋkop dakon gen gat ae bisitnin gat da uŋun jap morap paŋtelak asak.

Timoti uŋun Kristo dakon oman amin tagisi egipjak

⁶ Gak gen on Yesu yolyol amin notgoni do yobi kaŋ, gak Yesu Kristo dakon oman amin tagisi egipdisal. Ae gen bami nandaŋ gadamaŋ ae nandak nandak tagisi timigeŋ yolgamaŋ uŋun da gak tapmim madepsi gamdisak.

⁷ Mani babak dakon morap gen Piŋkopmon da dima noman tawit, do uŋun gat ae gen morap amin da isal yoŋ uŋun gat manji yobi. Aŋek Piŋkop dakon aŋpak tagisi yolek egip do tagap tok madepsi abi.

⁸ Giptim aŋtagap ak amaŋ uŋun da paŋpulugok madep dima asak, mani wupnin aŋtagap amaŋ uŋun da paŋpulugok madepsi kinda asak, nido abisok ekwamaŋ ae don egip egip teban abidokdamaŋ uŋun kisi do paŋpulugok akdisak.

⁹ Gen unun bamisi amin kisi da nandanek nandan gadat tagi ani.

¹⁰ Nin pi madepsi aman nido Pin kop egip egipmi ton da nin panpulugokdisak yan nandan teban tanek jomjom anek ekwaman. Pin kop unun amin kisi yokwikon timit timit amini, ae nandan gadan iman amin unun ban si timitdisak.

¹¹ Gak gen on minat aminyo yoyin degek guramitni dosi yoyiki.

¹² Yum pindagaki amin da gak monji bilagi yan gandanek dima nandaba pinban gamni. Anpak tagisi anaki nandan gadat amin da anpakgo ban pindagek yan gin ani. Gen tagisi ban yoki, ae kilegisi egipbi, ae amin do but dasi galak tan yobi, ae nandan gadat bamisi abi, ae Pin kop da dabilon gwaljigi minisi egipbi.

¹³ Egi wigi si apben bisapmon gak pi madepsi anek Pin kop gen minat aminyo morapmi muwut nikon manjin yobi, ae mibili yan ten tenan yobi, ae Pin kop dakon anpak do yoyin dekgi.

¹⁴ Panmuwukbi dakon kila amin da kisitni kwen gokon witjinakwa amin kindu da gak do kombi gen yagit bisapmon Telagi Wup da but galak do tapmim gamgut unun yipbi dima yawotjak.

¹⁵ Bisapmi bisapmi pi morapgo do kila tagisi abi. Pi madepsi anaki minat amin morap da pi agakgo si madep tosok yan koni.

¹⁶ Gaga dakon anpak ae yoyindet agakgo do kila tagisi abi. Si teban tanek sigin abi kan, Pin kop da gaga gat ae gengo nandan amin gat kisi yokwikon ban timitdisak.

5

Timoti miñat aminyo naga dakon yawi diwat yanşi pindatjak

¹ Gak amin pelan gen tebai dima yoyiki. Datgo gen yaworikon da yoyin panmilip asal, yan gin gen yaworikon da yoyin panmilip abi. Ae gaga dakon padik padikgo do anpak nian asal, monji bulagi do yan gin abi.

² Ae menjo do anpak nian an yomisal, miñat pelan do yan gin abi. Ae samingoni do anpak yokwi dima an yomisal, miñatjok bulagi do yan gin anpak yokwi dima anyobi.

Namin da sakwabat kilani asak?

³ Sakwabat morap panpulugokni minisi ekwan unun ban panpulugoni.

⁴ Mani sakwabat unun monjini di ton bo ae uwani di ton kan, panpulugarbi Pin kop da dabilon anpak madepsi kinda unun nandan pisoni. Unun meni kilani tagisi anek mej datyo da kalip pi madep awit unun dakon gomani tagi sopni. Pin kop da anpak unuden do tagisi nandisak.

⁵ Miñat kinda sakwabat egek panpulugokni minisi egisak kan, unun miñat Pin kop nandan gadan imin kimagek Pin kop da yo tagisi an imjak do nandanek jomjom asak. Anek gildari ae kalbi Pin kop da anpulugosak do bisit asak.

⁶ Mani sakwabat kinda unun giptim dakon galaktok yoldak kan, miñat unun amin kimakbi yombem.

⁷ Do miñat unun yoyinbi anpak tagisi banjin anakwa amin da yanba yokwi tok dima anyomni.

⁸ Amin kinds iyı dakon yawi diwatni dima panpulugosak kan, unun amin tagi dima. Mani amin kinds iyı dakon gwakni kisi kilani tagi dima asak kan, unun amin nandan gadatni kili yipman dekgit, do amin yokwisi. Pinkop dima nandan iman amin yapmanek unun wagil yokwisi.

⁹ Sakwabat dakon man silipmon, minat oden dakon man banjin mandaki: Minat bilak 60 yapmandak, ae eni kaloni dakon minatni egipgut unun dakon man banjin mandaki.

¹⁰ Ae pi tagisi mibili mibili agit dakon man bini tan yoman unun dakon man banjin mandaki. Nak pi tagisi oden do yosot: Gwakni kila tagisi agit, ae amin kokup nwaknwarikon da apba kilani anek panpulugagit, ae panmuwukbi dakon kandap pakbi ban sugagit, ae jigikon ekwan amin panpulugagit, ae pi tagisi diwari agit. Gak minat unuden dakon man banjin mandaki.

¹¹ Mani minatjok sakwabat dakon man dima mandaki. Nido giptimni dakon galaktok yolek burikon da minat eyo kaluk aeni ak do nandan bisapmon Kristo manji iman.

¹² Anek yan teban tok awit unun yapmanjan, do gulusunni tan yomisak.

¹³ Ae unun gin dima, kuraktok anpak timigek yut diwarikon agi agi an. Ae kuraktok anpak gin dima, amin diwari da yo an unun dakon geni nandak do galagi nandan. Anek gen morapmi dima yogogi yon.

¹⁴ Do minatjok sakwabat egipni unun amin panek monji panalanek yutni kila ani do nandisat. Yan

ani kañ, uwal da anpakni tagisi unun kañek gen yokwi aripmi dima yañ imni.

¹⁵ Disi nandan, miñatjok sakwabat diwari kosit kilegi kili yipman dekgwit da Sunduk yolgañ.

¹⁶ Kristo nandan gadañ imisak miñat kinda da yutgwan miñat diwari sakwabat ekwan kañ, miñat unun da iyi kilani asak. Yañ anakwan pañmuwukbi miñat aminyo diwari da kilani ak do jigì dima pani, ae sakwabat morap pañpulugokni minisi ekwan unun bañ kilani tagi ani.

Kila amin pi tagi an unun kilani tagisi ani

¹⁷ Ji kila amin pi tagisi an amin man madep yominek tagisi yuman noni. Mibiltoksi yomni amin unun: Pin kop gen yañ tenjenok an amin gat, ae Pin kop gen yoyindet an amin.

¹⁸ Yañsi ani, nido Pin kop gen papia da yañ yosok. “Ji bulmakau wit gip golek do baman misinikgan bisapmon jap noni do gen kagani dima sopni.”

Ae kinda yañ yosok:

“Pi amin yuman nogini aripmi tagi timitjak.”

¹⁹ Amin kinda da kila amin kinda do sun kinda ak yañ yosak kañ, geni do mirak dima yopbi. Mani bamori bo kapbi da gen unuden yanba kañ, geni tagi nandaki.

²⁰ Ae kila amin kinda yokwi asak kañ, pañmuwukbi morap da dabilon anmilip abi, anjaki diwari pasol pasol timitni.

Timoti iyi dakon anpak kañ kimotjak

²¹ Piŋkop ae Yesu Kristo ae Piŋkop dakon anjelo kabı da dabilon noman yaŋsi gayısat, gen morap on gayısat uŋun yol kimagek pi abi. Anek amin kisikon anpak tilak kalonjikon da pi abi.

²² Piŋkop dakon pi asak do gak amin kindı da kwenon kisitgo tepmisi wutjik do dima nandaki. Amin diwari dakon yokwi da gagon di teŋanbam. Gak gaga do kila tagisi anek Piŋkop da dabilon gwaljigi minisi egıpi.

²³ Gak pakbisigin dima noki. Butgo anpulugosak ae sot uŋun toktogi noman taŋ gamısak uŋun mudosak do wain disok kisi noki.

²⁴ Amin diwari dakon yokwini uŋun nomansi toŋ. Ae amin da nandan, Piŋkop da uŋun amin gen pikon yopmaŋek kobogi yokwi yomdisak. Mani amin diwari yokwini pasili toŋ, ae don noman tokdan.

²⁵ Uŋudeŋ gin, amin diwari anpakni tagisi noman gin toŋ. Mani, amin diwari anpakni tagisi uŋun noman dima toŋ, uŋun don noman tokdan.

6

Oman monji anpak tagisi banjin ani

¹ Yesu yolyol amin morap amin diwari dakon oman amini ekwan, madepni man madep yomınek piŋbini egıpi. Yaŋ aba amin da Piŋkop dakon man ae paŋmuwukbi nin dakon nandan gadat do yaŋba yokwi tok dima ani.

² Ae oman amin kindı dakon madepni uŋun nandan gadat amin kindı kaŋ, oman amin uŋun

“notno gin do geni tagi abin yipben” yan di nandaban. Dima, unun yan si nandisak, “Amin unun Yesu yolyol amin kinda, do pini an iminek but dasi galak tan iben” yan nandisak. Anakwan nandak nandak unuden da antagap aban pi tagisi akdisak.

Moneŋ dakon galagi unun yokwi dakon mibili

Gak bisapmi bisapmi miŋat aminyo anpak kilegi ban ani do yoyin dekgi, anek anpak gayigim unun ani dosi yoyiki.

³ Amin Taginin Yesu Kristo dakon gen da Pin kop dakon anpak do niyin dekdak. Amin kinda gen unun yipmanek miŋat aminyo gen nwanwari Yesu dakon geni kilegi yombem kinda nan dima yoyin detjak kan,

⁴ yan nandanen, unun amin kwen wigik asak, ae nandak nandakni minisi. Unun gen emat anek gen dakon mibili do notni pabin yop do pi asak. Yan anek yo yan panalon asak: tagisi ekwan amin do nandaba yokwi tok, ae emat, ae yanba yokwi tok, ae amin diwari do but giman nandanek nandaba yokwi tok.

⁵ Ae bisapmi bisapmi gen emat anekwan. Amin anpak unuden an unun nandak nandakni wagisi upbal tawit, ae gen bamisok kinda dima nandan. Unun Pin kop dakon anpak do yo morap timit timit kosit kinda yan nandan.

⁶ Mani, amin kinda Pin kop yolek yo kabini do nandaban aripmi tan naman yan nandisak kan, unun amin yo bamisi timikdak.

6:3: Gal 1.6-9

6:5: 2Ti 3.8; 4.4; Tit 1.14

4.8; Ibr 13.5

6:6: Pil 4.11-12; 1Ti

⁷ Nin nandaman, menj da panjalarban miktimon altagiman bisapmon yo kinda dima abidanek apguman. Ae miktim yipman detnej bisapmon yo di dima timigek kisdaman.

⁸ Yanjo, jap imalyonin di tanj nimni kan, “unjun aripninon” yanj yonej.

⁹ Mani, monej morapmi timit do nandan amin, kilap da paron yokwalgan da arip, panjkwel da altan yominek timitdisak. Unjun nandan kokwini tagi dima amin da but sulugik morapmi anek unjun da obisi panjntok akdisak. Yanj anek wagilsi tasik tanj mudokdan.

¹⁰ Monej do galagi nandak nandak unjun yokwi morap dakon mibili. Amin diwari monej do galak tawit, unjun da ilikban nandan gadatni yipman dekgwit anek jiggi morapmi panek bupmisi nandan.

Gak tebaisi kinjek egip egip teban abidoki

¹¹ Mani, gak Pinjkop dakon amin egisal, do anpak yokwi unjuden morap yopman degek pasal kiki. Pi tebaisi anek yo oden banj timikgi: anpak kilegi, ae Pinjkop dakon anpak, ae nandan gadat, ae amin do but dasi galak tanj yomyom anpak, ae tebaisi agek jiggi imet imet anpak, ae amin do yo yawori anj yomyom anpak.

¹² Kristo nandan gadan imisak amin unjun nabi gwapbokon kisak. Do gak nabi gwapbo tagisi unjudon tebaisi kinjek egip egip teban abidoki. Tebaisi agek nandan gadatgo amin morapmi da dabilon yanj tentenagil bisapmon, Pinjkop da egip egip abidoki do kili yanj gamgut.

¹³ Piŋkop yo morap kisi do egip egip yomisak unun da dabilon, ae Yesu Kristo Pontias Pailat da inamon tebaisi agek gen bami yagit unun da dabilon nak tebaisi yan gayisat,

¹⁴ gak gen abidagil unun guramik kimagek amin da yanba yokwi tok an gamni da aripmon yo kinda dima abi. Tebaisi guramik kimagaki wigi Amin Taginin Yesu Kristo da noman altosak bisapmon wugisak.

¹⁵ Unun Piŋkop da bisap yipgut unudon al-tokdisak. Piŋkop unun ankisih kimotneŋsi. Unun kalon dagin yo morap kila asak. Unun kila amin madep morap dakon Kila Amin Madepni, ae amin tagi morap dakon Amin Tagini.

¹⁶ Unun kalon dagin dima kimokdok, unun tenjenj madepmon egisak, ae nin unun da kapmatjok aripmi dima kikigi. Amin kinda da dima kagit, ae kinda da dima kokogi. Man madepni ae tapmim madepni unun bisap dagok dagogi mini tan imdisak teban. Unun asi.

Yoni morapmi amin Piŋkop nandan gadan iminek minjat aminyo diwari panpulugoni

¹⁷ Yoni morapmi amin on miktimon ekwan yoyinbi iyi dakon man dima pawigini. Ae yo morapni tepmi bisal kigi do nandan gadat dima ani. Unun Piŋkop dosi nandan gadan imni. Unun Piŋkop da nin da kisik kisik anen do yo tagisi morapmi nimisak.

¹⁸ Yoyinbi anpak tagisi morapmi anek yo do wadak wadak an amin do yo morapmi yomni.

Yonin bami unun amin do yo tagisi an yomyom anpak unun yan nandani.

¹⁹ Yan ani kan, iyi don panpulugoni dakon yoni morapmi panmuwutdan, ae unun yoni morapmi tebai tokdan. Anek egip egip bamisi abidokdan.

Timoti pini do kila tagisi asak

²⁰ Timoti, Pin kop da pi unun gamgut unun kila tagisi an kimokgi. Gen mibili mibili Pin kop dakon galaktok dima yolyoli yon amin, unun amin gat dima egipbi. Ae amin nandak nandaknin ton yan nandanek Pin kop dakon gen bami anupbal anek gen yon amin, unun da dubagikon egipbi.

²¹ Amin diwari unuden nandak nandak yolek nandan gadatni kili yipman dekgwit.

Pin kop dakon nandan yawot jikon tosak do bisit asat.

PIN^KOP GEN
The New Testament and Psalms in the Yopno Language
of Papua New Guinea
Nupela Testamen na Buk Song long tokples Yopno long
Niugini

copyright © 2010 Wycliffe Bible Translators, Inc.

Language: Yopno

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

PDF generated using Haiola and XeLaTeX on 18 Apr 2025 from source files dated 31 Aug 2023

b683ce50-d820-5bfc-8471-d8ee080be106